

# 1 Tesalonaika

## Polbë oto pasë, Tesalonaika onehome kë yahi tégletëmebë

*Polna Tesalonaika lifate mago onehome tako maninibomu lamëtletëma*

<sup>1</sup> Bo Pol, Sailas na Timoti, sebo aomalë, pasë some, Tesalonaika lifate mago Kristen onehome, ekë yahi nëletëyo. Sobo aya Gotobë na Tako Ho Jisas Klaisbë oneho. Bo metole nanelë, Goto na Tako Ho Jisas Klaisna bubë maninibo lowene matlëyo na flalego tafa naegelome.

*Pol, Tesalonaika oneho, Jisame kë lowene sle mëgletlabë lowenebëme, fleflesu tletëme*

<sup>2</sup> Sebo Gotome fleflesuna gëgali nelelëkefla sebo some lowene nëglekefëtëyome nëgeme. Sebo some lowene nanëlekefëtëyo Gotome gëgali nëglelëkeflana. Some aholokwana hana ti nëlekefëya. <sup>3</sup> Sebobë aya Gotome kë gëgali nëglelëkeflabë, sebo some ebë wesibibëme lowene nëlekefëtëyo. Sobo Jisame kë lowene sle egletelobë lowene, some lale wegebëme huju lëtakefëyo. Sobo fli enëneme tole egletemome nëgeme na bume aitamobë wegeme këme afutuku elekefo. Sobo Tako Ho Jisas Klaisme melowene sle egletelome, tokwafe seme nënome ligisime. Iniwa hobota some kë fata lëglekefëtëyobë, këbë lowene bu some laitakefëyo, sobo tafa sle naegëlobëme. Na këme nëgeme, sebo Gotome këme fleflesu nëlekefëtla. <sup>4</sup> O Kristen afani na oneglëni, Goto

some tako tolemu lalëletëyo. Na sebo some melowene nanëletëyomu, Goto some wafi aniji tolëyo, bubë enëne egëtabetelobëme.

<sup>5</sup> Jisasbë lale gali, sebo some kë tëgehitëyobë, somëta galiwa nane tisitëyo. Weye. Bu afutukuna Gotobë Amtëtombana iniwa tisitëyo. Na sebo Jisame kë lowene sle nëgletlabë lowene, sobo hwi sle tlometëna. Na sobo seme melowene tletëna, sebo kë të togotlabë lale gali, sebo melowene slemu nanëletla, nëgali gali mu. Sebo sobobë ku mëta kë tafa tëglabë lale tafa, wafi hwi tlotëna. Sebo melë kë tëglabë, Jisasbë lowene esogobëme, some lebotane tëtatëyo.

<sup>6</sup> Sebobë tafa fene tëbekefëtëna, sobo këha tafa esogo tlelëkeflo. Na Jisasbë tafa fene tëbetle sobo këha tafa esogo tlelëkeflo. Sobo Gotobë lale gali yafe aholokwane telo na esogo tlelëlo. Na fli oneho some mana kë wame motlëyo na lebutako tëbo we-sibi some mana fata mëtletëyo, kwe sobo këbëme welili hana telo. Weye. Gotobë Amtëtomba some lataito na sobo Gotobë lale gali fleflesuna aholokwane tletelo. <sup>7</sup> Këme nëgeme, Jisame kë lowene sle mëglekefëtlabë oneho, Masedonia provins mëta na Akaia provins mëta kë tafa mëglabë, sobobë kë lale tafa hwi motloteyome nëgeme na bu melowene mëtlame, bubë lale tafa fene lëbetëme, sebo mata këha tafa manëla. <sup>8</sup> Tako Hobë Jisasbë gali, sobo kë të togotlobë, kakëmu metugujutëyo latle, fwamo lego fene tiwatëyo. Na kë galibë, Masedonia provins magowa na Akaia provins magowa nane aholokwane motokouja. Weye. Sobo Gotome kë lowene sle egletelobë gali, iniwa life mago oneho mata aholokwane lamotokouja. Këme nëgeme, kë

galibë, ita hana gali nëglame. <sup>9</sup> Sebo sobelë kë tigisiyabë, na iniwa wesibi kë fata mëtlebë, oneho kë gali buwa të mëtëtagula. Bu some gali metë lametakefëtëyo, sobobë iniwa fëso fëso lowenebë aholokwana ti telo na unalëme lëgëtabebë Gotome fwa lowene eletelome na bume fwa tafa eletelo na bubë wege enëne tafa elo. <sup>10</sup> Bu seme mata megali motlona, Sobo Gotobë Nëbame melowene ekletelome, bu heven lifate kile luguleme na ita lisime. Jisas bu seme, bubë glina Gotobë enisusu mago wafi nëno tle. Tokwafe Gotobë enisusu ligisina sebo nëgëtabëya sle nanëglame.

## 2

*Pol Tesalonaika lifatëme kë wege tëglebëme, gali tle*

<sup>1</sup> O Kristen afani na oneglëni, sobo seme walowene eletëna sebo sobelë kë tigisiyabë këbë asëbë tuwati asë nane. <sup>2</sup> Sobo seme wafi lowene eletëna. Sebo sobelë tigisiya jwa tëglana, Filipai lifate mëta sebo aomalë tako elili fa totlamu, na seme tako lëlafala lamëtëtanamu. Na sebo tako elili kë mëta fa totla. Na sebo sobelë kë tigisiyabë, Filipai lifate mago enëne fene wame motlona bu seme melë lamëtëtana. Kwe sebobë Goto, sebobë lowene afutukumu latlelëmetëna na sebo këbë wamebë kikli hana təkaketlamu na sebo mana Gotobë lale gali të tëtatëyo. <sup>3</sup> Sebo some, Jisame lowene sle ekletelobë galime, gali tolëyona, këbë mëta yaya galiha hana gali tla. Sebo some meyaya lowenena nane tisitëyo, sebo sobobë wesibi manawa glo nanëgletëyome. Weye. Na sebo some sogëna sogëname nane tisitëyo. <sup>4</sup> Weye. Goto sebobë lowene wahwi sle tlotëna,

na bubë tolenawa seme Jisasbë lale gali tēbë wege tlēna. Kēme nēgeme sebo melēme nane wege nēla, oneho sebobë wegeme na fleflesu mēgletēname. Weye. Sebo metole nanēla, Goto sebobë lowene hwi loglomeme, na sebobë wege buwa fleflesu lēletleme.<sup>5</sup> Sobo wafi lowene tletēna sebo sobobë lowene lale lale galina hana sisile totometēyo. Weyewa. Na sebo lale lale galime mata gēgali hana tla na sebobë mēmaune lowene kēna lēlamu notlame. Weye. Goto bu mata kē wesibime walowene lēletēna.<sup>6</sup> Sebo kē wege kē fa nogotlabë, sebo melēme nane fa notla, sebo fli enēneme flesu ho fata nanēgletēmame o sobo seme flesu ho fē naetaname. Weye.<sup>7</sup> Sebo Jisas Klaisbë ēfalēbo enēne nētabetla na sebo flesu enēneha kēme nētabēya. Kēme nēgeme, sebo metole nēglabë kwe, some megali noglēyome fene, “Sobo seme aitana.” Kwe sebo some megali hana tlolēyo. Weye. Sebo somēta kē tafa tēglabë, flalego tafana tafa tla nēbale tokwētokwē fenene.<sup>8</sup> Sebo some tako tolemu latletēyo. Kēme nēgeme Gotobë lale gali some fleflesuna kēme tlēyo. Sebo some Gotobë lale galiwa nane tlēyo. Weye. Sebo iniwa wesibi melē nēglabēme, wafi sagli tlēla, some nēgaito nanēglabēme. Sobo sebobë yabenimu tafa tēgelome nēgeme.

<sup>9</sup> O kristen afani na oneglēni, sobo wafi lowene elo. Sebo somēta kē tafa tēglabë na Gotobë lale gali kē tē tētātēyobë, sebo baliti glo wege mata anisasanamu fa totla. Melēme nēgeme, sebo wesibi kē balitina glo nanēglekefēyame, some sosalē nēgētolime. Kēme nēgeme, sebo olēna klabēna sebobë tobana kēme wege tlekefēya, sobo seme we-

sibime egaitanalime.

<sup>10</sup> Sebo somëta kë tafa tëglabë loweneme, sobo walowene eletëna na Goto mata seme lowene lalëletëna. Sobo, Jisame kë lowene sle egletelobë onehobë ku mëta, tafa tëglana, sebo Gotobë naba lime, lale tafawa latla. Na sebo li wesibiha kë mëta hana tëbo totla. Weyewa. <sup>11</sup> Sobo seme lowene laletëna. Bolijaya bubë nëbaleme fene laitame, sebo some melë tegaito latla. <sup>12</sup> Sebo melë latla, sobobë lowene tufiji tëgëtatëyobë gali tolëyo, na sebo some tegaito gali mata gali tolëyo. Na sebo some anisasana megali tolëyo: “Sobo Goto kë tole lëgletlebë tafana satafa elo. Goto bu some wawe tolëyo, bu eso home kë tafa lëgletëmebë oneho belë naekaklijome. Na bubë onehona iniwa lale tafa naegelome.”

*Kristen oneho, bume kë fata mëtletëmebë tëbo wesibime boblo lamototoma*

<sup>13</sup> Sebo itaita kë wesibime mata Gotome fleflesu galina gali nolokwefla. Sebo some Gotobë gali alako të tëtatëyona sobo melowene hana telo, hobë gali. Weye. Sobo melowene latelo, Gotobë nëgali galimu. Nëgali, kë gali ebë Gotobë gali. Na kë galiwa, sobo Jisame kë lowene sle egletelobë lowene, buwa sle lotokwefëmetëyo. <sup>14</sup> O Kristen afani na oneglëni, Jisas Klaisme kë lowene mëgletlabë oneho, Judia provins mëta kë tafa mëglabë fenene, sobo mefata lalo. Sobobë yabenino, some tëbo lamëtakefëo. Israelbë afenëboni, bu Jisame kë lowene sle mëgletlabë onehome, Judia provins mëta kë tafa mëglabëme, fene tëbo motokwefëma. <sup>15</sup> Kë Israelbë afenëboni, Gotobë ëfalëbo mago gali ëtani anebo kë mëtehilabë

home mogo nalë tètëkle mètëtakefëya. Na bu mata, Tako Home Jisame mogo nalë tëkle mototla. Na bu seme mata hehë mëtletëna. Bu Goto kë tole lëgletlebë lowene boblo mètëtakefëtla. Na bu iniwa onehome wame molokwefëma. <sup>16</sup> Kë Israelbë afenëboni seme yafe lëkle mètëtakefëna, Goto onehome tafa sle logotomebë gali, Israelbë afenëboni mëtäbëya jwa kë mëglabë enëneme, të jwa nanëtatëmame. Bu melëme tole jwa mëtëglame nëgeme, Israelbë afenëbo metabëya jwa kë mëglabë onehome Goto nëno lëgoukëfelime, seme këme lëkle mètëtakefëna fene. Bu tëbo lowene feilawa fafa motokwefla na kë tëbo lowene bubë ëtanifu tëbo lowenena iniwa loko lokweitëmeme. Këme nëgeme, Gotobë enisusu bume wafata tletëme na tëbo logotomeme nounou lalële.

*Polbë lowene huju tletle, Tesalonaika lifate mago onehome ita hwi nalugujelëmeme*

<sup>17</sup> O Kristen afani na oneglëni, ëbame Israelbë afenëboni seme somago heheë mëtletëna. Na kë afolo olëna, sebo some maninibo latletëyo, boli-jaya nëbale kakë tafa moguletlabë fenene. Sebo sobobë weniyane hwi hana nolometëyo kwe sebobë lowene somëta mana lëbetëna. Këme nëgeme sebo alëge feilawa hohwi këme nëtëtakefëtla, so betelë ita nigisiya nanëglame na some ita hwi nanoglëyome. Sebo some ita hwime tako tolemu nanëla. <sup>18</sup> Sebo sobelë nigisiyame tole nanëla. Na bo Pol, bo sobelë nigisitëyome yafe yafe nanëlekefë. Kwe Satan seme lëkle lälëtakefëna, na sebo sobelë nigisiya jwa këme nëla. <sup>19</sup> Unina, sebobë Tako Ho Jisas, ita ligisina, seme fëye wesibi, afutuku

lëglëlänamene, na sebo këna bubë naba lime fleflesuna nilibetlame. Sebo bume fëye wesibi lebotane nëgëtatlamenë bu melowene nalëgletëname, sebo bubë wege, wege sle latëtatla. Sebo kwe some fwa fleflesu nëletëyome. Na some fwa lebotane nëtome. <sup>20</sup> Nakwefëyemene, sebo some fleflesu nanelekefëtëyo na lëlou nëlekefëtëyo.

### 3

*Pol Timotime jine tlële, Tesalonaika lifate mago onehome lëgaitame nalëgleme*

<sup>1</sup> Na kwe, sebo Atens life mëta tafa tëglabë, sebo some ita tako manibomu latletëyo na melowene tletëyo, sebo some ita hwi nëglëyobëme, tako tole latla, këme nëgëme sebo hwi hana tla. Na sebo melowene tla, sebo Sailasna, Atens life mëta tafa nelome. <sup>2</sup> Na Timotime sobelë jine nelëbaklome. Bu sebobë Kristen afa na bu Gotobë wege ho na sebo Gotobë wegeme ilawa wege nëla, Jisas Klaisbë lale gali ilawa tē nētagula. Sebo bume sobelë jine tlëlo, some lëgaito nalëgleme, Jisame kë lowene sle eglotelobë lowene, esogo sle naegletelome. <sup>3</sup> Na su wesibi some kë fata lëgletëyobë, somago fli tutune egelolime na Jisame kë lowene sle eglotelobë lowene kile egelolime. Sobo lowene lalo, seme ebë su wesibi kë fata mëgletë nabë Gotobë toleme fata mëletëna. <sup>4</sup> Sebo sobona mana tafa tëglana, sebo some megali latlëyo, “Tokwafe seme lili hobota fata mëgletëname.” Na sobo melowene wafi eletelo, sebo fene gali tolëyo, kë tēbo olë seme wafata lëletëna. <sup>5</sup> Bo melowene hana tletëyo, sobo Jisame kë lowene sle eglotelobë lowene mana ehola o hanane, na bo feilawa

mehwi hana tètëkakë. Këme nëgeme bo Timotime sobelë këme jine telëbaklë. Bo metutune tēgelëme nëgeme, Satan some susu lēgētōlime na sobo Jisame kë lowene sle eglētelobē lowene aholokwana ti egelōlime. Na sebo somēta kë wege tēglabē wege manawa tēbo lēglētēnalime.

*Timoti lale gali tehitleme nëgeme, Pol këme fleflesu tle*

<sup>6</sup> Kwe Timoti sobona tafa tulo na some hune tuto na bu se mēta tokwafe fata tēkaki. Na sobo kë tafa eglēlobē lale gali seme tē tētātēna. Bu some me-gali latletēyo, “Sobo Jisame feilawa mana lowene sle elekefētelo. Na sobo fli onehome mata mana tole elekefētemo. Na sobo seme mana lowene elekefētēna, na fleflesu lalekefētēna. Sebo some hwi nanogloyome fene maninibo nēlekefētēyo, sobo mata seme hwi naegloname memaninibo lalekefētēna.” <sup>7</sup> O Kristen afani na oneglēni, ho seme kë wame moglonabē, sebo kë wesibi mēta nētabēya. Kwe sebo some meaholokwane latleteyo, sobo Jisame feilawa mana lowene sle elekefētelo, na këbēwa seme taitana na sebobē lowene sle tētātēna. <sup>8</sup> Sebo ebē gali meaholokwane tla, sobo Tako Home Jisame mana lowene sle elekefētelo. Na sebo flalego tafana këme tafa nēla. <sup>9</sup> Sebo some Jisame kë lowene sle eglētelobē loweneme, lowene nēletēyo, na sebo Gotome fleflesu galina gali nanolokwefla. Sebobē Gotobē naba lime, sebo feilawamu fleflesu nēla. Na kë fleflesu galibēme Gotome habēna gali noglōlamene. <sup>10</sup> Sebo kljijina klabēna, Gotome itaita metakune nanolokwefla, bu seme lēgaitana nalēgleme, some hwibēme nigisiteyo nanēglame. Na sobo Jisame kë



lowene sle egletelobë loweneme afolo egletelona, kwe sebo some nanëgaitome, sobo Jisame feilawa lowene sle naegletelome.

*Pol, Gotome gali tlole, bume lëgaitale nalëgleme, Tesalonaika lifate mago onehome hwime lugu-jutëme nalëgleme*

<sup>11</sup> Sebo metole nanëla; sebobë aya Goto na sebobë Tako Ho Jisas Klais, sebobë alëge sle nalëtatëname, sebo some hwime nigisiya nanëglame. <sup>12</sup> Sebo metole nanëletëyo. Tako Ho Jisas, fli onehome tole egletemobë lowenebë, some feilawamu lëglëyome. Na sobolalo feilawa tole eglelëgome na iniwa onehome mata tole eletemome, sebo some fene tole nëletëyo. <sup>13</sup> Sebo metole nanëla, Goto këbë lowenena, sobobë lowene lëgaitatëyome. Na sebobë Tako Ho Jisas, bubë onehona iniwa ita migisiyana, kwe Jisas some ëhwati tafa hwi egletelobë oneho hwi lëglëyome na sobo lale oneho egëtabome. Na kwe sebobë aya Gotobë naba lime, tëbo wesibiha hana lëgebetëyome.

## 4

*Sebo Goto kë tole lëgletlebë tolewa sa esogo ne-glelëlame*

<sup>1</sup> O Kristen afani na oneglëni, sebo some Gotobë tole esogo eglelëlobë lowene iniwa wafi okokwe tolëyo. Na sobo kë iniwa lowene esogo elelëkeflo, sebo fene gali tolëyo. Kwe sebo ëje some, Tako Ho Jisasbë wenijina megali nanolëyo, sobo kë lowene anisasana itaita saesogo elelëkeflo.

<sup>2</sup> Iniwa gali, sebo Tako Ho Jisasbë wenijina kë gali toglyëyobë, sobo walowene sle eletelo. <sup>3</sup> Gotobë tole, melëgëbetle lalële: Sobo iniwa tetëbo lowene aholokwana ti elome na ëhwati oneho etabome. Sobo iniwa lisë lisë loweneme hëhele, egelome na aholokwana ti elome. <sup>4-5</sup> Sobo, jowa jowa, lisei lowene, sobobë lowene mëta kë mëgebebë lëlë etokwefëmome. Sobobë lowene, one mëmaunebë lowene mëta asa gwa etokweflo. Na bume lisei lisei eglelëmobë lowene asa huju malëletëyo. Weye. Këha tole asa esogo elekeflo, Gotome lowene jwa mëgletlabë oneho fene melekefëya. Sobo Goto kë tole lëgletëmebë lalë lowenewa esogo elëlekefëtelome. <sup>6</sup> Sobo Kristen afanime na oneglënime sosogëna asa elëmo na bubë ho o mëse liseë nabana hwi elotleme. Sobo melë egelona kwe sobo bume tëbo lowene mëta gogwa egelome. Ètani sebo some anisasana megali latolëyo, “Iniwa ho bu këha wesibi mëglabëme, Tako Ho Goto, bume tëbo logotomememu.” <sup>7</sup> Goto seme lisë lowene esogo nëglelëlabëme nane aniji tlonä. Hanane mu. Bu seme kë aniji toglonabëye melë: sobobë lowene bume nëglëla nanëglame na ëhwati lowenewa, esogo nanëglelëlame. <sup>8</sup> Këme nëgëme, ho ebë gali boblo logotlena, kwe bu hobë galiwa nane boblo lëtatëme. Weye. Bu Gotobë gali boblo lëtatle, some bubë Amtëtomba kë lëglëkefëyobë Goto.

### *Sobo sobolalo yonane egelome*

<sup>9</sup> Sobolalo kë yonane eglelëgobëme, hana yahi nëgletëyome. Melëme nëgëme, Goto some onehome yonane eglelëmobë loweneme wafi okokwe tolëyo.

<sup>10</sup> Na ebë bu nëgalimu; sobo Masedonia provins

mëta kë tafa mokoujabë Kristen onehome tole lalekefëtemo. Kwe Kristen afani na oneglëni, sebo some anisasana megali nolëyo, sobo këbë lowene feilawamu saesogo elelëkeflo. <sup>11</sup> Sobo aholabu lowene jwa na wame lowene jwabë onehoha tafa egelobëme, sa afutuku elo. Sobo fli enëne kë fa motokweflabë wesibime asa gali elokwefëmo. Sobo kë egelobë wesibiwa lowene elekefëtemome. Na sobobë tobana wesibi etomome, sobobë tafa këna egaitalo naegelome, ëtani sebo some fene gali tolëyo. <sup>12</sup> Sobo melë egelona, kwe sobo wesibime afolo hana egletemome na fli onehome, some mëgaitobëme takune hana eglokwefëmome. Na Jisame lowene sle jwa mëgletlabë oneho bu sobo kë tafa egelobë tafa hwi moglotëyona bu some fleflesu mëgletëyome na some megali mlame, “Lale enënemu.”

### *Tako Ho Jisas ita ligisime*

<sup>13</sup> O Kristen afani na oneglëni, sebo metole nanëletëyo, gigli kë mëtebëyabë Kristen onehome, wesibi fata lëgletëmebë wesibime, sobo lowene sle naegletemome. Sobo, gigli mëtebëyabë Kristen enëneme feilawa maninibo asa eletemo, Gotome lowene jwa mëgletlabë oneho fene mla. Këbë enëne, gli mago huhuju mëglabë lowene hana lëbetëme. <sup>14</sup> Sebo melowene nanëla, Jisas gli tle na gli mago huhuju tle. Këme nëgeme sebo melowene nanëla, Jisasbë afutukuna, Goto, Kristen onehome, gigli mago huhuju logotomeme na bu Jisasna iniwa misiyame. <sup>15</sup> Sebo ëje kë të nëgëtatëyobë gali, ebë bu Tako Hobë gali. Bu melë lëgëbetle lalële. Tokwafe, Tako Ho Jisas ita

ligisina, sebo tuja ato mana kē tafa nēglabē oneho, sebo afina hana nokwalame, Jisame oloba mēta esune nanēglēlame. Weye. Hanane mu. <sup>16</sup> Goto feilawa we loglomeme, na bubē eso ensel mata we lēgleme na Gotobē funiji elamēme. Na Tako Ho Jisas, Heven life kile luleme na lisime. Na Jisame kē lowene sle mētletlabē oneho, gigli kē mēglabē, bu afina huhuju mlame. <sup>17</sup> Kē olēna, sebo tuja ato mana kē tafa nēglabē oneho na gigli mago kē huhuju mēglabē oneho, sebo iniwa Tako Ho Jisame oloba mēta esune nowelēlame. Na sebo Tako Ho Jisasna unaunalēme tafa nēlame. <sup>18</sup> Na kwe, sobolalo, kē gali tē etokweflome, sobobē lowene kēna aitakefēmome.

## 5

### *Sebo Jisas ligisibēme sagli nēglētlame*

<sup>1</sup> O Kristen afani na oneglēni, sebo Jisas ligisibē olēme, hana gali sle noglēyome. <sup>2</sup> Sobo wafi lowene eletelo. Jisas ligisibē olē, bu lafatawa lēgleme, tokli ho klabē fene lisi. <sup>3</sup> Oneho megali mēglame, “Ēje sebobē lale fleflesu olē lemotēna. Na seme wame moglonabē enēne hana tafa mla. Weyewa.” Kē olēna, bume tēbo logotomebē wesibi, lafatawa lēletēmeme, mēse nēba amlebo fene fale etamē. Na kwe bu kē wesibi hana elē mēglēlame. <sup>4</sup> O Kristen afani na oneglēni, sobo klabē mēta tafa egelobē oneho nane, klelego kē egelome. Weye. Kēme nēgeme some kē olē fata lēglēna klelego hana egletelome, ho tokli home hwime fene klelego lēle. Weye. <sup>5</sup> Sobo iniwa, elulego mēta asē egelobē oneho. Sebo tlokofini mago oneho nane. Weye.

6 Këme nêgeme, sebo lili sloslowa asa manëla. Gotome lowene jwa mëgletlabë oneho fene mla. Sebo sagli nêglêlame, Jisas ligisibë olême mana hwi nêkakatlame. 7 Sebo lowene nanela, bu nini mëgebëyabë enëne bu klabë nini lamebëya. Kye mëglabë enëne bu klabë kye kye mëla. 8 Kwe sebo kwe kliji elulego mëta tafa nêglabë oneho. Sebo këme lowene sle nêglame. Sebo Gotome lowene slemu nêletlame na fli onehome mata tolemu nêletëmame. Kë lowenebë seme, Satanbë tetëbo lowenebëme title lëtaname, yako lamu kaba soldiamme fene title etole. Na Jisas seme nênome ligisibë lowene, lowene sle nêletlame. Kë lowenebë seme, Satanbë tetëbo lowenebëme title lëtaname, eso kaba soldiamme fene title etole. 9 Goto seme melême nane aniji tlon, Gotobë enisusu mëta tafa nêlame. Weye. Bu seme melême aniji tlon, sebobë Tako Ho Jisas seme nêno nalëgleme. 10 Ètani Jisas wafi gli tle, seme legaitanabëme. Këme nêgeme, sebo tuja ato mana tafa nêglana o sebo gigli nêglana na bu mana lisina, kwe sebo buna ëhwati atobëna tafa nêglame. 11 Këme nêgeme, sobolalo, këbë lalë galina gëgali elelëgome na sobolalo, sobobë lowene aitamome, sobo fene elekefo.

*Jisame kë lowene mëgletlabë onehome, lalë lowene fabëme, Goto lëgaitameme*

12 O Kristen afani na oneglëni, sebo some megali nolëyo! Some kë moutatëyobë na kë mëgaitakëfëyobë hobë gali aholokwane elomome na esogo elëletëmome. Tako Ho, some kë mougoutatëyobë home, aniji tlome, some tafa namëglelëyome. Bu some Gotobë galime okokwe lamolokwefëyo na sobobë tëbo lowene sle

motokwefëmetëyo. <sup>13</sup> Sobobë kume, wege kë fa motokweflabë enëneme lowene eletemo na bume lale lowenenamu yonane elelëmome na bume tolemu sle eletemome. Na sobo iniwa jowa lowene mëta fwa etabome na yonanewa elome.

<sup>14</sup> O Kristen afani na oneglëni, sebo some anisasana megali nolëyo! Sobobë ku mëta, wege jwa kë tatafa mëglabë onehobë lowene anisasa galina sasle etometemo. Na tutune na uli kë mëglabë onehobë lowene alabuju galina sle etometemome. Na afutuku jwa kë tafa mëglabë onehome aitamome. Na sobo iniwa onehome alabuju elelëmome. <sup>15</sup> Oneho some gëglë mëglelëyona, kwe sobo kofaya bume asa gëglë elelëmo. Weye. Iniwa olë sobo Gotobë onehome ululu etomome na iniwa onehome mata ululu sle etomome.

<sup>16</sup> Sobo itaita fleflesu eglekefome. <sup>17</sup> Na sobo Gotome gëgali elelëkeflome. <sup>18</sup> Lale wesibi o tëbo wesibi some fata legletëyona, sobo Gotome fleflesu gali nawa sa gali elokweflo. Goto metole lalële, Jisabë lowene mëta kë asë egelobë enëne, sobo këha lowenewa saehokweflo. <sup>19</sup> Gotobë Amtëtomba some li wesibi fa egotlobëme huju lëgëtona, sobo lëkle asa etlo. <sup>20</sup> Na Gotobë ëfalëbo mago gali some kë të mëgëtatëyobëme heheë asa elo. <sup>21</sup> Kwe sobo iniwa gali kë aholokwane eglobë, sobobë lowene mëta obobwelë elujuwetomome. Na iniwa lale gali, ehwëyome na esogo elelëmome. <sup>22</sup> Na sobo iniwa memelë tetëbo galime na tetëbo loweneme hëhele egelome.

<sup>23</sup> Bo metole nanelë, Gotobë maninibo tli lowene, buwa sobobë iniwa tëbo lowene

sle malotometëyo, ëhwati onehomu fata naegletelome. Na bu sobobë atona lowenena iniwa ululu sle nalotometëyome, sobo lalowamu tafa naegelome. Na sebobë Tako Ho Jisas ita mana lisime, Gotobë naba li mëta tëbo wesibi liha hana lëgebetëyome. <sup>24</sup> Some bubë oneho fata egelome kë aniji toglëyobë Goto, bu kë wesibi some fata lëgëtatëyome. Bu melëme nëgeme, bubë iniwa gali esogo lalëlelëkefle.

<sup>25</sup> O Kristen afani na oneglëni, sobo Gotome sagëgali elelëlo, bu seme lëgaitana nalëgleme. <sup>26</sup> Sebo Gotome kë lowene nëgletlabë onehobë lowene fene lëbetëna, sobo fli Kristen afanime na oneglënimë sasësle etomo. <sup>27</sup> Bo Tako hobë wenijina some, anisasana megali nolëyo, sobo ebë pasë Jisame kë lowene mëgletlabë iniwa onehobë aholo li mëta sahwi elëyo. <sup>28</sup> Sebo metole nanëla, sebobë Tako Ho Jisas Klais some ululu sle malëto.

**Ĕhwati Gali**  
**Portions of the Holy Bible in the Yalë language of**  
**Papua New Guinea**  
**Buk Baibel long tokples Yalë long Niugini**

copyright © 2022 Wycliffe Bible Translators, Inc.

Language: Yalë (Yale)

CC BY-SA required by use of Sweet Publishing CC BY-SA licensed illustrations in the printed edition.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-09

---

PDF generated using Haiola and XeLaTeX on 25 Aug 2023 from source files dated 16 Aug 2023

4a4fca1d-2276-53e5-95b2-a315846297c3